

2 Sói, góa íkeng koattēng, góa bê beh koh tài tiòh iusiong khì kàu lín hia. **2** Inūi góa nā hō lín iusiong, áne, tūliáu lín chiahe inūi góa lâi iusiong ê lâng ígōa, iáu ū siáⁿ lâng ē tàng hō góa hoaⁿhí?

Paulô ê Chêng Chit Tiuⁿ Phoe

3 Íchêng góa siá hit tiuⁿ phoe hō lín, sī inūi khióngkiaⁿ góa khì lín hia ê sī, hiahê púnlâi engkai hō góa hoaⁿhí ê lâng, khiok tiantò hō góa iusiong. Góa khaksìn góa ê hoaⁿhí tòh sī lín tãike ê hoaⁿhí. **4** Góa tī kéktoa ê iusiong kah thòngkhó tióng, lâu chin chē baksái siá phoe hō lín, bóktek pēng m̄ sī beh hō lín iusiong, khiok sī beh hō lín chai góa tù lín ê thiàⁿ ū gōa chhim.

Siàbián ū Kòesit ê Lâng

5 Nā ū lâng hō lâng iusiong, i m̄ sī kantaⁿ hō góa iusiong niāniā, i mā tī bó chióng thêngtō siōng hō lín tióngkan chitkóa lâng iusiong. Góa áne kóng, chiahe bē tù i siuⁿ giamlē. **6** Hit khoán lâng íkeng hō lín tōa tosò ê lâng chekhoát kah ū kàngiáh ā. **7** Lín tiantò tiòh kā i khoansiá, kā i anùi, biántit i kòethâu iusiong soah tikàu choátbāng. **8** Sói, góa khúnkiú lín tiòh hō i chai lín khaksit ū teh thiàⁿ i. **9** Íchêng góa siá hit tiuⁿ phoe hō lín, sī ài beh chai lín sī m̄ sī ē khamtit khógiām, sī m̄ sī goānì itchhè lóng sūnhók góa ê chísi. **10** Lín siàbián siáⁿmih lâng, góa mā beh siàbián i; góa sī tī Kitok ê bīnchêng, ūi tiòh lín ê iánkòe lâi siàbián i, **11** chiahe bián hō Satán iânⁿkòe lán, inūi lán chin chhengchhó Satán ê kúikè.

Paulô tī Thóloa ê chhauhoân

12 Tng góa khì Thóloa thoân Kitok ê hokim ê sī, Chú íkeng ūi góa ê kangchok khuilō. **13** M̄ koh,

2 所以，我已經決定，我無 beh koh 帶 tiòh 憂傷去到 lín hia。 **2** 因為我若 hō lín 憂傷， áne，除了 lín chiahe 因為我來憂傷 ê 人以外， iáu 有啥人 ē tàng hō我歡喜？

保羅 ê 前一張 Phoe

3 以前我寫 hit 張 phoe hō lín，是因為恐驚我去 lín hia ê 時， hiahê 本來應該 hō我歡喜 ê 人，卻顛倒 hō我憂傷。我確信我 ê 歡喜 tòh 是 lín 大家 ê 歡喜。 **4** 我 tī 極大 ê 憂傷 kah 痛苦中，流真 chē 目屎寫 phoe hō lín，目的並 m̄ 是 beh hō lín 憂傷，卻是 beh hō lín 知我對 lín ê 疼有 gōa 深。

赦免有過失 ê 人

5 若有人 hō 人憂傷，伊 m̄ 是 kantaⁿ hō 我憂傷 niāniā，伊 mā tī 某種程度上 hō lín 中間一 kóa 人憂傷。我 áne 講， chiahe bē 對伊 siuⁿ 嚴厲。 **6** Hit 款人已經 hō lín 大多數 ê 人責罰 kah 有夠額 ā。 **7** Lín 顛倒 tiòh kā 伊寬赦， kā 伊安慰，免得伊過頭憂傷 soah 致到絕望。 **8** 所以，我懇求 lín tiòh hō 伊知 lín 確實有 teh 疼伊。 **9** 以前我寫 hit 張 phoe hō lín，是 ài beh 知 lín 是 m̄ 是 ē 堪得考驗，是 m̄ 是願意一切 lóng 順服我 ê 指示。 **10** Lín 赦免啥物人，我 mā beh 赦免伊；我是 tī 基督 ê 面前，為 tiòh lín ê 緣故來赦免伊， **11** chiahe 免 hō 撒旦贏過咱，因為咱真清楚撒旦 ê 詭計。

保羅 tī 特羅亞 ê 操煩

12 當我去特羅亞傳基督 ê 福音 ê 時，主已經為我 ê 工作開路。 **13** M̄ koh，因為我無 tú tiòh

inūi góa bô tú tiòh góa ê hiaⁿtī Tîto, tìsú góa ê simsin huishông putan, sói, tòh kah in sio sî, khi kàu Maketóniah.

Óakhò Kitok Teksèng

14 Kámsiā SiōngChú, inūi I sísiông tàiniá goán tī Kitok nih teksèng, koh thongkòe goán tī tàk sóchāi hiánbêng hitê inūi jīnbat Kitok chiah ū ê phangbī. 15 Inūi bôlūn sī tī titkiù á sī tīmlūn ê lâng tiongkan, goán chiáⁿchò Kitok ê phangbī hiàn hō SiōngChú. 16 Tùi tīmlūn ê lâng lâi kóng, che sī síbông ê chhàubī; tùi titkiù ê lâng lâi kóng, khiok sī sèⁿmiā ê phangbī. Nā áne, siáⁿ lâng ū kàngiáh ê lênglèk thang chò chit khoán tāichì? 17 Goán bô chhinchiūⁿ chēchē lâng kā SiōngChú ê tōlí tòngchò siongphín lâi bébē; goán tiantò sī chò chitê sêngsít ê lâng, siū SiōngChú ê chhephài, óakhò Kitok lâi soankáng tōlí.

我 ê 兄弟提多，致使我 ê 心神非常不安，所以， tòh kah in 相辭，去到馬其頓。

Óa 靠基督得勝

14 感謝上主，因為祂時常帶領阮 tī 基督裡得勝，koh 通過阮 tī tàk 所在顯明 hitê 因為認 bat 基督 chiah 有 ê 芳味。 15 因為無論是 tī 得救 á 是沉淪 ê 人中間，阮成做基督 ê 芳味獻 hō 上主。 16 對沉淪 ê 人來講，這是死亡 ê 臭味；對得救 ê 人來講，卻是性命 ê 芳味。若 áne，啥人有夠額 ê 能力 thang 做 chit 款 tāichì? 17 阮無親像 chēchē 人 kā 上主 ê 道理當做商品來買賣；阮顛倒是做一個誠實 ê 人，受上主 ê 差派， óa 靠基督來宣講道理。